

une mort plus cruelle. C'e nous est un bon-  
 heur, qu'une partie de cette croix vraye-  
 ment pesante, soit à nous mesmes nostre par-  
 tage, que nous ayons veu de nos freres y  
 resspandre leur sang, & y endurer des tour-  
 mens, dont la cause les pourra bien faire  
 passer quelque iour pour martyrs; qu'il n'y  
 en ait pas un de nous qui ne puisse esperer  
 de les suiure, au milieu des braziers ar-  
 dens, où ils ont esté consumez: & que  
 maintenant l'estat des affaires soit tel, que  
 nous soyons heureusement neceffitez de  
 beaucoup souffrir, & de tout craindre, au  
 seruire du grand Maistre dont nous annon-  
 çons les grandeurs en ces pays Barbares.  
 Nous adorons ses diuines conduites, & sur  
 nous & sur nostre troupeau; nous le be-  
 nissons du passé; & nous attendons avec  
 amour, & ie puis dire avec la ioye de no-  
 stre cœur, ce que nostre nature pourroit re-  
 doubter dauantage, car c'est ainsi qu'il me-  
 rite luy seul d'estre seruy. Nous le prions  
 que ses diuines volontez soient accomplies